

सुन्दरकाण्ड

पूजन विधि, हनुमान चालीसा, हनुमानाष्टक,
बजरंग बाण, स्तवन, स्तुति एवं आरती सहित




॥ श्री गणेशाय नमः ॥

गीता प्रेस गोरखपुर द्वारा प्रसारित
श्रीरामचरितमानस का पाँचवाँ सोपान

सुन्दर काण्ड

(पूजन विधि, हनुमान चालीसा, हनुमानाष्टक,
बजरंग बाण, स्तवन, स्तुति एवं आरती सहित)



श्री शिव प्रकाशन मंदिर

2994, बल्ली मारान, दिल्ली-110006

दूरभाष : 23974978, 23917707

20/-

पूजन विधि

सुन्दर काण्ड का पाठ करने हेतु साधक सम्पूर्ण स्वच्छता से पूर्व या उत्तर दिशा की ओर मुख करके बैठें तथा विघ्न विनाशक श्री गणेश जी का स्मरण करते हुए निम्नलिखित विधि से पूजन प्रारम्भ करें—

ध्यान : रक्ताम्भोजदलाभिरामनयनं पीताम्बरालंकृतं,
श्यामांगद्विभुजं प्रसन्न वदनं श्री सीतया शोभितम् ।।
करुणामृतसागरं प्रियै गणै भ्रात्रादिभिर्भावितं,
वन्दे विष्णु शिवादिशेव्यमनिशं भक्तेष्ट सिद्धिप्रदम् ।।

आह्वान : आगच्छ जानकी नाथ जानक्या सह राघव,
गृहाण मम पूजाम चः वायुपुत्रादिभर्युतः ।।

घोडशोपचार पूजन : स्वर्ण रचितं राम दिव्या स्तरण शोभितम् ।
आसनं हि मया दत्तं गृहाण मणिचित्रकम् ।।

विनियोग : ॐ अस्य श्री मन्मानस्य रामायण श्री राम
चरितस्य श्री शिवकाक भुसुण्डि-याज्ञवल्क्य-गोस्वामी
तुलसीदास ऋषयः सीता रामो देवता श्री राम नाम बीजं
भवरोग हरी भक्तिः शक्तिः मम नियन्त्रिवाशेष विघ्नतया
श्री सीता राम प्रीति पूर्वक सकल मनोरथ सिद्धि अर्थ पाठे
विनियोगः ।


आचमन : श्री सीता रामाय नमः । श्री राम चन्द्राय नमः ।
श्री राम भद्राय नमः ।

उपरोक्त श्लोक का उच्चारण करते हुए तीन बार आचमन करने के पश्चात् प्राणायाम करें व करन्यास तथा हृदयादिन्यास करके ध्यान करें ।

नोट : सुन्दर काण्ड पाठ आरम्भ करने से पहले कथा के तारतम्य के लिए किष्किन्धाकाण्ड की निम्नलिखित चौपाइयाँ पढ़नी चाहिए।

पाठ प्रारम्भ

दो०-बलि बाँधत प्रभु बाढ़ेउ सो तनु बरनि न जाई।
 उभय घरी महँ दीन्हि सात प्रदच्छिन धाड़ि॥
 अंगद कहइ जाउँ मैं पारा।
 जियँ संसय कछु फिरती बारा॥
 जामवंत कह तुम्ह सब लायक।
 पठइअ किमि सबही कर नायक॥
 कहइ रीछपति सुनु हनुमाना।
 का चुप साधि रहेहु बलवाना॥
 पवन तनय बल पवन समाना।
 बुधि बिबेक बिग्यान निधाना॥
 कवन सो काज कठिन जगमाहीं।
 जो नहिं होइ तात तुम्ह पाहीं॥



राम काज लगि तव अवतारा ।
 सुनतहिं भयउ पर्वताकारा ॥
 कनक बरन तन तेज बिराजा ।
 मानहुँ अपर गिरिन्ह कर राजा ॥
 सिंहनाद करि बारहिं बारा ।
 लीलहिं नाघऊँ जलनिधि खारा ॥
 सहित सहाय रावनहि मारी ।
 आनउँ इहाँ त्रिकूट उपारी ॥

जामवंत मैं पूँछउँ तोही ।
 उचित सिखावनु दीजहु मोही ॥
 एतना करहु तात तुम्ह जाई ।
 सीतहि देखि कहहु सुधि आई ॥
 तब निज भुज बल राजिवनैना ।
 कौतुक लागि संग कपि सेना ॥

छन्द

कपि सेन संग संघारि निसिचर रामु सीतहि आनि हैं ॥
 त्रैलोक पावन सुजसु सुर मुनि नारदादि बखानिहैं ॥
 जो सुनत गावत कहत समुझत परमपद नर पावई ॥
 रघुबीर पद पाथोज मधुकर दास तुलसी गावई ॥

दोहा

भव भेषज रघुनाथ जसु सुनहिं जे नर अरु नारि ॥
 तिन्ह कर सकल मनोरथ सिद्ध करहिं त्रिसिरारि ॥

सोरठा

नीलोत्पल तन स्याम काम कोटि सोभा अधिक ॥
 सुनिअ तासु गुन ग्राम जासु, नाम अघ खग बधिक ॥

6 सुन्दरकाण्ड



सुन्दरकाण्ड

॥ श्लोक ॥

शान्तं शाश्वतमप्रमेयमनघं निर्वाणशान्तिप्रदं
ब्रह्माशम्भु फणीन्द्रसेव्यमनिशं वेदान्तवेद्यं विभुम्।
रामाख्यं जगदीश्वरं सुरगुरुं मायामनुष्यं हरिं
वन्देऽहं करुणाकरं रघुवरं भूपालचूडामणिम्॥
नान्या स्पृहा रघुपते हृदयेऽस्मदीये

सत्यं वदामि च भवानखिलान्तरात्मा।

भक्तिं प्रयच्छ रघुपुङ्गव निर्भरां मे

कामादिदोषरहितं कुरु मानसं च॥

अतुलितबलधामं हेमशैलाभदेहं

दनुजवनकृशानुं ज्ञानिनामग्रगण्यम्।

सकलगुणनिधानं वानराणामधीशं

रघुपतिप्रियभक्तं वातजातं नमामि॥

॥ चौपाई ॥

जामवंत के बचन सुहाए।

सुनि हनुमंत हृदय अति भाए॥

तब लगि मोहि परिखेहु तुम्ह भाई।
 सहि दुख कंद मूल फल खाई॥
 जब लगि आवौं सीतहि देखी।
 होइहि काजु मोहि हरष बिसेषी॥
 यह कहि नाइ सबन्हि कहूँ माथा।
 चलेउ हरषि हियँ धरि रघुनाथा॥
 सिंधु तीर एक भूधर सुंदर।
 कौतुक कूदि चढ़ेउ ता ऊपर॥
 बार बार रघुबीर सँभारी।
 तरकेउ पवनतनय बल भारी॥
 जेहिं गिरि चरन देइ हनुमंता।
 चलेउ सो गा पाताल तुरंता॥
 जिमि अमोघ रघुपति कर बाना।
 एही भाँति चलेउ हनुमाना॥
 जलनिधि रघुपति दूत बिचारी।
 तैं मैनाक होहि श्रम हारी॥
 दो०-हनुमान तेहि परसा कर पुनि कीन्ह प्रनाम।
 राम काजु कीन्हें बिनु मोहि कहाँ विश्राम॥



जात पवनसुत देवन्ह देखा ।
 जानैं कहूँ बल बुद्धि बिसेषा ॥
 सुरसा नाम अहिन्ह कै माता ।
 पठइन्हि आइ कही तेहिं बाता ॥
 आजु सुरन्ह मोहि दीन्ह अहारा ।
 सुनत बचन कह पवनकुमारा ॥
 राम काजु करि फिरि मैं आवौं ।
 सीता कइ सुधि प्रभुहि सुनावौं ॥

तब तव बदन पैठिहउँ आई।
 सत्य कहउँ मोहि जान दे माई॥
 कवनेहुँ जतन देइ नहिं जाना।
 ग्रससि न मोहि कहेउ हनुमाना॥
 जोजन भरि तेहिं बदनु पसारा।
 कपि तनु कीन्ह दुगुन बिस्तारा॥
 सोरह जोजन मुख तेहिं ठयऊ।
 तुरत पवनसुत बत्तिस भयऊ॥
 जस जस सुरसा बदनु बढावा।
 तासु दून कपि रूप देखावा॥
 सत जोजन तेहिं आनन कीन्हा।
 अति लघु रूप पवनसुत लीन्हा॥
 बदन पड़िठि पुनि बाहेर आवा।
 मागा बिदा ताहि सिरु नावा॥
 मोहि सुरन्ह जेहि लागि पठावा।
 बुधि बल मरमु तोर मैं पावा॥

दो०-राम काजु सबु करिहहु तुम्ह बल बुद्धि निधान।
 आसिष देइ गई सो हरषि चलेउ हनुमान॥



निसिचरि एक सिंधु महँ रहई।
 करि माया नभु के खग गहई॥
 जीव जन्तु जे गगन उड़ाहीं।
 जल बिलोकि तिन्ह कै परिछाहीं॥
 गहइ छाहँ सक सो न उड़ाई।
 एहि बिधि सदा गगनचर खाई॥
 सोइ छल हनुमान कहँ कीन्हा।
 तासु कपटु कपि तुरतहिं चीन्हा॥

ताहि मारि मारुतसुत बीरा।
 बारिधि पार गयउ मतिधीरा॥
 तहाँ जाइ देखी बन सोभा।
 गुंजत चंचरीक मधु लोभा॥
 नाना तरु फल फूल सुहाए।
 खग मृग बृन्द देखि मन भाए॥
 सैल बिसाल देखि एक आगें।
 ता पर धाइ चढ़ेउ भय त्यागें॥
 उमा न कछु कपि कै अधिकार्ई।
 प्रभु प्रताप जो कालहि खाई॥
 गिरि पर चढ़ि लंका तेहिं देखी।
 कहि न जाइ अति दुर्ग बिसेषी॥
 अति उतंग जलनिधि चहु पासा।
 कनक कोट कर परम प्रकासा॥


छ०-कनक कोटि विचित्र मनि कृत सुन्दरायतना घना।
 चउहट्ट हट्ट सुवट्ट बीथीं चारु पुर बहु विधि बना॥
 गज वाजि खच्चर निकर पदचर रथ बरूथन्हि को गनै।
 बहुरूप निसिचर जूथ अतिबल सेन बरनत नहिं वनै॥



वन बाग उपवन बाटिका सर कूप बापीं सोहहीं।
 नर नाग सुर गन्धर्व कन्या रूप मुनि मन मोहहीं॥
 कहूँ माल देह बिसाल सैल समान अतिबल गर्जहीं।
 नाना अखारेन्ह भिरहिं बहुविधि एक एकन्ह तर्जहीं॥
 करि जतन भट कोटिन्ह विकट तन नगर चहूँ दिसि रच्छहीं।
 कहूँ महिष मानुष धेनु खर अज खल निसाचर भच्छहीं॥
 एहि लागि तुलसीदास इन्ह की कथा कह्यु एक है कही।
 रघुवीर सर तीरथ सरीरन्ह त्यागि गति पैहहिं सही॥
 दो०-पुर रखवारे देखि बहु कपि मन कीन्ह बिचार।
 अति लघु रूप धरौं निसि नगर करौं पइसार॥

मसक समान रूप कपि धरी।
 लंकहि चलेउ सुमिरि नरहरी॥
 नाम लंकिनी एक निसिचरी।
 सो कह चलेसि मोहि निन्दरी॥
 जानेहि नहीं मरमु सठ मोरा।
 मोर अहार जहाँ लगि चोरा॥
 मुठिका एक महा कपि हनी।
 रुधिर बमत धरनीं ढनमनी॥
 पुनि संभारि उठी सो लंका।
 जोरि पानि कर बिनय ससंका॥
 जब रावनहि ब्रह्म बर दीन्हा।
 चलत बिरंचि कहा मोहि चीन्हा॥
 बिकल होसि तैं कपि कें मारे।
 तब जानेसु निसिचर संघारे॥
 तात मोर अति पुन्य बहूता।
 देखेउँ नयन राम कर दूता॥

दो०-तात स्वर्ग अपवर्ग सुख धरिअ तुला एक अंग।
 तूल न ताहि सकल मिलि जो सुख लव सतसंग॥



प्रबिसि नगर कीजे सब काजा ।
 हृदयँ राखि कोसलपुर राजा ॥
 गरल सुधा रिपु करहिं मिताई ।
 गोपद सिंधु अनल सितलाई ॥
 गरुड़ सुमेरु रेनु सम ताही ।
 राम कृपा करि चितवा जाही ॥
 अति लघु रूप धरेउ हनुमाना ।
 पैठा नगर सुमिरि भगवाना ॥


मंदिर मंदिर प्रति करि सोधा ।
 देखे जहाँ तहाँ अगनित जोधा ॥
 गयउ दसानन मंदिर माहीं ।
 अति बिचित्र कहि जात सो नाहीं ॥
 सयन किँएँ देखा कपि तेही ।
 मंदिर महुँ न दीखि बैदेही ॥
 भवन एक पुनि दीख सुहावा ।
 हरि मन्दिर तहाँ भिन्न बनावा ॥
 दो०-रामायुध अंकित गृह सोभा बरनि न जाइ ।
 नव तुलसिका बृंद तहाँ देखि हरष कपिराइ ॥
 लंका निसिचर निकर निवासा ।
 इहाँ कहाँ सज्जन कर बासा ॥
 मन महुँ तरक करै कपि लागा ।
 तेहीं समय बिभीषनु जागा ॥
 राम राम तेहिं सुमिरन कीन्हा ।
 हृदयँ हरष कपि सज्जन चीन्हा ॥
 एहि सन हठि करिहउँ पहिचानी ।
 साधु ते होइ न कारज हानी ॥



बिप्र रूप धरि बचन सुनाए।
 सुनत बिभीषन उठि तहँ आए॥
 करि प्रणाम पूँछी कुसलाई।
 बिप्र कहहु निज कथा बुझाई॥
 की तुम्ह हरि दासन्ह महँ कोई।
 मोरें हृदय प्रीति अति होई॥
 की तुम्ह रामु दीन अनुरागी।
 आयहु मोहि करन बड़भागी॥

दो०-तब हनुमंत कही सब राम कथा निज नाम।
 सुनत जुगल तन पुलक मन मगन सुमिरि गुन ग्राम॥

सुनहु पवनसुत रहनि हमारी ।
 जिमि दसनन्हि महुँ जीभ बिचारी ।।
 तात कबहुँ मोहि जानि अनाथा ।
 करिहहिं कृपा भानुकुल नाथा ।।
 तामस तनु कछु साधन नाहीं ।
 प्रीति न पद सरोज मन माहीं ।।
 अब मोहि भा भरोस हनुमन्ता ।
 बिनु हरि कृपा मिलहिं नहिं संता ।।
 जाँ रघुबीर अनुग्रह कीन्हा ।
 तौ तुम्ह मोहि दरसु हठि दीन्हा ।।
 सुनहु बिभीषन प्रभु कै रीती ।
 करहिं सदा सेवक पर प्रीती ।।
 कहहु कवन मैं परम कुलीना ।
 कपि चंचल सबहीं बिधि हीना ।।
 प्रात लेइ जो नाम हमारा ।
 तेहि दिन ताहि न मिलै अहारा ।।



दो०-अस मैं अधम सखा सुनु मोहू पर रघुबीर।
 कीन्ही कृपा सुमिरि गुन भरे बिलोचन नीर॥
 जानतहूँ अस स्वामि बिसारी।
 फिरहिं ते काहे न होहिं दुखारी॥
 एहि बिधि कहत राम गुन ग्रामा।
 पावा अनिर्वाच्य बिश्रामा॥
 पुनि सब कथा बिभीषन कही।
 जेहि बिधि जनक सुता तहँ रही॥

तब हनुमन्त कहा सुनु भ्राता ।
 देखी चहउँ जानकी माता ॥
 जुगुति बिभीषन सकल सुनाई ।
 चलेउ पवनसुत बिदा कराई ॥
 करि सोइ रूप गयउ पुनि तहवाँ ।
 बन असोक सीता रह जहवाँ ॥
 देखि मनहि महुँ कीन्ह प्रनामा ।
 बैठेहिं बीति जात निसि जामा ॥
 कृस तनु सीस जटा एक बेनी ।
 जपति हृदयँ रघुपति गुन श्रेनी ॥
 दो०-निज पद नयन दिअँ मन राम पद कमल लीन ।
 परम दुखी भा पवनसुत देखि जानकी दीन ॥
 तरु पल्लव महुँ रहा लुकाई ।
 करइ बिचार करौं का भाई ॥
 तेहि अवसर रावनु तहँ आवा ।
 संग नारि बहु किएँ बनावा ॥
 बहु बिधि खल सीतहि समुझावा ।
 साम दान भय भेद देखावा ॥



कह रावनु सुनु सुमुखि सयानी ।
 मंदोदरी आदि सब रानी ॥
 तव अनुचरीं करउँ पन मोरा ।
 एक बार बिलोकु मम ओरा ॥
 तू न धरि ओट कहति बैदेही ।
 सुमिरि अवधपति परम सनेही ॥
 सुनु दसमुख खद्योत प्रकासा ।
 कबहुँ कि नलिनी करइ बिकासा ॥
 अस मन समुझु कहति जानकी ।
 खल सुधि नहिं रघुबीर बान की ॥

सठ सूनें हरि आनेहि मोही ।

अधम निलज्ज लाज नहिं तोही ॥

दो०-आपुहि सुनि खद्योत सम रामहि भानु समान ।

परुष बचन सुनि काढ़ि असि बोला अति खिसिआन ॥

सीता तैं मम कृत अपमाना ।

कटिहउँ तव सिर कठिन कृपाना ॥

नाहिं त सपदि मानु मम बानी ।

सुमुखि होति न त जीवन हानी ॥

स्याम सरोज दाम सम सुन्दर ।

प्रभु भुज करि कर सम दसकंधर ॥

सो भुज कंठ कि तव असि घोरा ।

सुनु सठ अस प्रवान पन मोरा ॥

चन्द्रहास हरु मम परितापं ।

रघुपति बिरह अनल संजातं ॥

सीतल निसित बहसि बर धारा ।

कह सीता हरु मम दुख भारा ॥



सुनत बचन पुनि मारन धावा ।
 मयतनयाँ कहि नीति बुझावा ॥
 कहेसि सकल निसिचरिन्ह बोलाई ।
 सीतहि बहु बिधि त्रासहु जाई ॥
 मास दिवस महुँ कहा न माना ।
 तौ मैं मारबि काढ़ि कृपाना ॥
 दो०-भवन गयउ दसकंधर इहाँ पिसाचिनि बृंद ।
 सीतहि त्रास देखावहिं धरहिं रूप बहु मंद ॥

त्रिजटा नाम राच्छसी एका ।
 राम चरन रति निपुन बिबेका ॥
 सबन्हौ बोलि सुनाएसि सपना ।
 सीतहि सेइ करहु हित अपना ॥
 सपनें बानर लंका जारी ।
 जातुधान सेना सब मारी ॥
 खर आरूढ़ नगन दससीसा ।
 मुंडित सिर खंडित भुज बीसा ॥
 एहि बिधि सो दच्छिन दिसि जाई ।
 लंका मनहुं बिभीषन पाई ॥
 नगर फिरी रघुबीर दोहाई ।
 तब प्रभु सीता बोलि पठाई ॥
 यह सपना मैं कहउँ पुकारी ।
 होइहि सत्य गाँ दिन चारी ॥
 तासु बचन सुनि ते सब डरीं ।
 जनकसुता के चरनन्हि परीं ॥
 दो०-जहँ तहँ गई सकल तब सीता कर मन सोच ।
 मास दिवस बीतें मोहि मारिहि निसिचर पोच ॥




त्रिजटा सन बोलीं कर जोरी।
 मातु बिपति संगिनि तैं मोरी॥
 तजौं देह करु बेगि उपाई।
 दुसह बिरहु अब नहिं सहि जाई॥
 आनि काठ रचु चिता बनाई।
 मातु अनल पुनि देहि लगाई॥
 सत्य करहि मम प्रीति सयानी।
 सुनै को श्रवन सूल सम बानी॥

सुनत बचन पद गहि समुझाएसि ।
 प्रभु प्रताप बल सुजसु सुनाएसि ॥
 निसि न अनल मिल सुनु सुकुमारी ।
 अस कहि सो निज भवन सिधारी ॥
 कह सीता बिधि भा प्रतिकूला ।
 मिलिहि न पावक मिटिहि न सूला ॥
 देखिअत प्रगट गगन अंगारा ।
 अवनि न आवत एकउ तारा ॥
 पावकमय ससि स्रवत न आगी ।
 मानहुँ मोहि जानि हतभागी ॥
 सुनहि बिनय मम बिटप असोका ।
 सत्य नाम करु हरु मम सोका ॥
 नूतन किसलय अनल समाना ।
 देहि अगिनि जनि करहि निदाना ॥
 देखि परम बिरहाकुल सीता ।
 सो छन कपिहि कलप सम बीता ॥
 दो०-कपि करि हृदयँ बिचार दीन्ह मुद्रिका डारि तब ।
 जनु असोक अंगार दीन्ह हरषि उठि कर गहेउ ॥



तब देखी मुद्रिका मनोहर ।
 राम नाम अंकित अति सुन्दर ॥
 चकित चितव मुदरी पहिचानी ।
 हरष बिषाद हृदयँ अकुलानी ॥
 जीति को सकइ अजय रघुराई ।
 माया तें असि रचि नहिं जाई ॥
 सीता मन बिचार कर नाना ।
 मधुर बचन बोलेउ हनुमाना ॥

रामचन्द्र गुन बरनैँ लागा ।
 सुनतहिं सीता कर दुख भागा ॥
 लागीं सुनैँ श्रवन मन लाई ।
 आदिहु तें सब कथा सुनाई ॥
 श्रवनामृत जेहिं कथा सुहाई ।
 कही सो प्रगट होति किन भाई ॥
 तब हनुमंत निकट चलि गयऊ ।
 फिरि बैठीं मन बिसमय भयऊ ॥
 राम दूत मैं मातु जानकी ।
 सत्य सपथ करुना निधान की ॥
 यह मुद्रिका मातु मैं आनी ।
 दीन्हि राम तुम्ह कहँ सहिदानी ॥
 नर बानरहि संग कहु कैसैं ।
 कही कथा भइ संगति जैसैं ॥
 दो०-कपि के वचन सप्रेम सुनि उपजा मन बिस्वास ।
 जाना मन क्रम बचन यह कृपासिंधु कर दास ॥
 हरिजन जानि प्रीति अति गाढ़ी ।
 सजल नयन पुलकावलि बाढ़ी ॥




बूड़त बिरह जलधि हनुमाना ।
 भयहु तात मो कहूँ जल जाना ॥
 अब कहु कुसल जाउँ बलिहारी ।
 अनुज सहित सुख भवन खरारी ॥
 कोमलचित कृपाल रघुराई ।
 कपि केहि हेतु धरी निठुराई ॥
 सहज बानि सेवक सुखदायक ।
 कबहुँक सुरति करत रघुनायक ॥

कबहुँ नयन मम सीतल ताता ।
 होइहहिं निरखि स्याम मृदु गाता ॥
 बचनु न आव नयन भरे बारी ।
 अहह नाथ हौं निपट बिसारी ॥
 देखि परम बिरहाकुल सीता ।
 बोला कपि मृदु बचन बिनीता ॥
 मातु कुसल प्रभु अनुज समेता ।
 तव दुख दुखी सुकृपा निकेता ॥
 जनि जननी मानहु जियँ ऊना ।
 तुम्ह ते प्रेमु राम कें दूना ॥
 दो०-रघुपति कर संदेसु अब सुनु जननी धरि धीर ।
 अस कहि कपि गदगद भयउ भरे बिलोचन नीर ॥
 कहेउ राम बियोग तव सीता ।
 मो कहुँ सकल भए बिपरीता ॥
 नव तरु किसलय मनहुँ कृसानू ।
 काल निसा सम निसि ससि भानू ॥
 कुबलय बिपिन कुंत बन सरिसा ।
 बारिद तपत तेल जनु बरिसा ॥




जे हित रहे करत तेइ पीरा।
 उरग स्वास सम त्रिविध समीरा॥
 कहेहू तें कछु दुःख घटि होई।
 काहि कहाँ यह जान न कोई॥
 तत्व प्रेम कर मम अरु तोरा।
 जानंत प्रिया एकु मनु मोरा॥
 सो मनु सदा रहत तोहि पाहीं।
 जानु प्रीति रसु एतनेहि माहीं॥

प्रभु संदेसु सुनत बैदेही ।
 मगन प्रेम तन सुधि नहिं तेही ॥
 कह कपि हृदयँ धीर धरु माता ।
 सुमिरु राम सेवक सुखदाता ॥
 उर आनहु रघुपति प्रभुताई ।
 सुनि मम बचन तजहु कदराई ॥
 दो०-निसिचर निकर पतंग सम रघुपति बान कृसानु ।
 जननी हृदयँ धीर धरु जरे निसाचर जानु ॥
 जाँ रघुबीर होति सुधि पाई ।
 करते नहिं बिलंबु रघुराई ॥
 राम बान रबि उएँ जानकी ।
 तम बरूथ कहँ जातुधान की ॥
 अबहिं मातु मैं जाउँ लवाई ।
 प्रभु आयसु नहिं राम दोहाई ॥
 कछुक दिवस जननी धरु धीरा ।
 कपिन्ह सहित अइहहिं रघुबीरा ॥
 निसिचर मारि तोहि लै जैहहिं ।
 तिहुँ पुर नारदादि जसु गैहहिं ॥




हैं सुत कपि सब तुम्हहि समाना ।
 जातुधान अति भट बलवाना ॥
 मोरें हृदय परम संदेहा ।
 सुनि कपि प्रगट कीन्हि निज देहा ॥
 कनक भूधराकार सरीरा ।
 समर भयंकर अतिबल बीरा ॥
 सीता मन भरोस तब भयऊ ।
 पुनि लघु रूप पवनसुत लयऊ ॥

दो०-सुनु माता साखामृग नहिं बल बुद्धि बिसाल ।
 प्रभु प्रताप तें गरुड़हि खाइ परम लघु ब्याल ॥
 मन संतोष सुनत कपि बानी ।
 भगति प्रताप तेज बल सानी ॥
 आसिष दीन्हि रामप्रिय जाना ।
 होहु तात बल सील निधाना ॥
 अजर अमर गुननिधि सुत होहू ।
 करहुँ बहुत रघुनायक छोहू ॥
 करहुँ कृपा प्रभु अस सुनि काना ।
 निर्भर प्रेम मगन हनुमाना ॥
 बार बार नाएसि पद सीसा ।
 बोला बचन जोरि कर कीसा ॥
 अब कृतकृत्य भयउँ मैं माता ।
 आसिष तव अमोघ बिख्याता ॥
 सुनहु मातु मोहि अतिसय भूखा ।
 लागि देखि सुन्दर फल रूखा ॥
 सुनु सुत करहिं बिपिन रखवारी ।
 परम सुभट रजनीचर भारी ॥




तिन्ह कर भय माता मोहि नाहीं ।
 जो तुम्ह सुख मानहु मन माहीं ॥
 दो०-देखि बुद्धि बल निपुन कपि कहेउ जानकीं जाहु ।
 रघुपति चरन हृदयँ धरि तात मधुर फल खाहु ॥
 चलेउ नाइ सिर पैठेउ बागा ।
 फल खाएसि तरु तोरें लागा ॥
 रहे तहाँ बहु भट रखवारे ।
 कछु मारेसि कछु जाइ पुकारे ॥

नाथ एक आवा कपि भारी ।
 तेहिं असोक बाटिका उजारी ॥
 खाएसि फल अरु बिटप उपारे ।
 रच्छक मर्दि मर्दि महि डारे ॥
 सुनि रावन पठए भट नाना ।
 तिन्हहि देखि गर्जेउ हनुमाना ॥
 सब रजनीचर कपि संघारे ।
 गए पुकारत कछु अधमारे ॥
 पुनि पठयउ तेहिं अच्छकुमारा ।
 चला संग लै सुभट अपारा ॥
 आवत देखि बिटप गहि तर्जा ।
 ताहि निपाति महाधुनि गर्जा ॥
 दो०-कछु मारेसि कछु मर्देसि कछु मिलएसि धरि धूरि ।
 कछु पुनि जाइ पुकारे प्रभु मर्कट बल भूरि ॥
 सुनि सुत बध लंकेस रिसाना ।
 पठएसि मेघनाद बलवाना ॥
 मारसि जनि सुत बाँधेसु ताही ।
 देखिअ कपिहि कहाँ कर आही ॥




चला इन्द्रजित अतुलित जोधा ।
 बंधु निधन सुनि उपजा क्रोधा ॥
 कपि देखा दारुन भट आवा ।
 कटकटाड़ गर्जा अरु धावा ॥
 अति बिसाल तरु एक उपारा ।
 बिरथ कीन्ह लंकेस कुमारा ॥
 रहे महाभट ताके संग ।
 गहि गहि कपि मर्दइ निज अंगा ॥

तिन्हहि निपाति ताहि सन बाजा।
 भिरे जुगल मानहुँ गजराजा॥
 मुठिका मारि चढ़ा तरु जाई।
 ताहि एक छन मुरुछा आई॥
 उठि बहोरि कीन्हिसि बहु माया।
 जीति न जाइ प्रभंजन जाया॥
 दो०-ब्रह्म अस्त्र तेहिं साँधा कपि मन कीन्ह बिचार।
 जौं न ब्रह्मसर मानउँ महिमा मिटइ अपार॥
 ब्रह्मबान कपि कहुँ तेहिं मारा।
 परतिहुँ बार कटकु संघारा॥
 तेहिं देखा कपि मुरुछित भयऊ।
 नागपास बाँधेसि लै गयऊ॥
 जासु नाम जपि सुनहु भवानी।
 भव बंधन काटहिं नर ग्यानी॥
 तासु दूत कि बंध तरु आवा।
 प्रभु कारज लागि कपिहिं बँधावा॥
 कपि बंधन सुनि निसिचर धाए।
 कौतुक लागि सभाँ सब आए॥




दसमुख सभा दीखि कपि जाई ।
 कहि न जाइ कछु अति प्रभुताई ॥
 कर जोरें सुर दिसिप बिनीता ।
 भृकुटि बिलोकत सकल सभीता ॥
 देखि प्रताप न कपि मन संका ।
 जिमि अहिगन महँ गरुड़ असंका ॥
 दो०-कपिहि बिलोकि दसानन बिहसा कहि दुर्बाद ।
 सुत बध सुरति कीन्हि पुनि उपजा हृदयँ बिषाद ॥

कह लंकेस कवन तैं कीसा ।
 केहि कें बल घालेहि बन खीसा ॥
 की धौं श्रवन सुनेहि नहिं मोही ।
 देखउँ अति असंक सठ तोही ॥
 मारे निसिचर केहिं अपराधा ।
 कहु सठ तोहि न प्रान कइ बाधा ॥
 सुनु रावन ब्रह्माण्ड निकाया ।
 पाइ जासु बल बिरचति माया ॥
 जाकें बल बिरंचि हरि ईसा ।
 पालत सृजत हरत दरसीसा ॥
 जा बल सीस धरत सहसानन ।
 अंडकोस समेत गिरि कानन ॥
 धरइ जो बिबिध देह सुरत्राता ।
 तुम्ह से सठन्ह सिखावनु दाता ॥
 हर कोदंड कठिन जेहिं भंजा ।
 तेहि समेत नृप दल मद गंजा ॥
 खर दूषन त्रिसिरा अरु बाली ।
 बधे सकल अतुलित बलसाली ॥




दो०-जाके बल लवलेस तें जितेहु चराचर झारि।
 तासु दूत मैं जा करि हरि आनेहु प्रिय नारि॥
 जानउँ मैं तुम्हारि प्रभुताई।
 सहसबाहु सन परी लराई॥
 समर बालि सन करि जसु पावा।
 सुनि कपि बचन बिहसि बिहरावा॥
 खायउँ फल प्रभु लागी भूँखा।
 कपि सुभाव तें तोरेउँ रूखा॥

सब कें देह परम प्रिय स्वामी ।
 मारहिं मोहि कुमारग गामी ॥
 जिन्ह मोहि मारा ते मैं मारे ।
 तेहि पर बाँधेउँ तनयँ तुम्हारे ॥
 मोहि न कछु बाँधे कइ लाजा ।
 कीन्ह चहउँ निज प्रभु कर काजा ॥
 बिनती करउँ जोरि कर रावन ।
 सुनहु मान तजि मोर सिखावन ॥
 देखहु तुम्ह निज कुलहि बिचारी ।
 भ्रम तजि भजहु भगत भय हारी ॥
 जाकें डर अति काल डेराई ।
 जो सुर असुर चराचर खाई ॥
 तासों बयरु कबहुँ नहिं कीजै ।
 मोरे कहें जानकी दीजै ॥
 दो०-प्रनतपाल रघुनायक करुना सिंधु खरारि ।
 गएँ सरन प्रभु राखिहैं तव अपराध बिसारि ॥
 राम चरन पंकज उर धरहू ।
 लंका अचल राजु तुम्ह करहू ॥



रिषि पुलस्ति जसु बिमल मयंका ।
 तेहि ससि महँ जनि होहु कलंका ॥
 राम नाम बिनु गिरा न सोहा ।
 देखु बिचारि त्यागि मद मोहा ॥
 बसन हीन नहिं सोह सुरारी ।
 सब भूषन भूषित बर नारी ॥
 राम बिमुख संपति प्रभुताई ।
 जाइ रही पाई बिनु पाई ॥

सजल मूल जिन्ह सरितन्ह नाहीं।
 बरषि गएँ पुनि तबहिं सुखाहीं॥
 सुनु दसकंठ कहउँ पन रोपी।
 बिमुख राम त्राता नहिं कोपी॥
 संकर सहस बिष्णु अज तोही।
 सकहिं न राखि राम कर द्रोही॥
 दो०-मोहमूल बहु सूल प्रद त्यागहु तम अभिमान।
 भजहु राम रघुनायक कृपा सिंधु भगवान॥
 जदपि कही कपि अति हित बानी।
 भगति बिबेक बिरति नय सानी॥
 बोला बिहसि महा अभिमानी।
 मिला हमहि कपि गुर बड़ ग्यानी॥
 मृत्यु निकट आई खल तोही।
 लागेसि अधम सिखावन मोही॥
 उलटा होइहि कह हनुमाना।
 मतिभ्रम तोर प्रगट मैं जाना॥
 सुनि कपि बचन बहुत खिसिआना।
 बेगि न हरहूँ मूढ़ कर प्राना॥



सुनत निसाचर मारन धाए।
 सचिवन्ह सहित बिभीषनु आए॥
 नाइ सीस करि बिनय बहूता।
 नीति बिरोध न मारिअ दूता॥
 आन दंड कछु करिअ गोसाँई।
 सबहीं कहा मंत्र भल भाई॥
 सुनत बिहसि बोला दसकंधर।
 अंग भंग करि पठइअ बंदर॥

दो०-कपि कें ममता पूँछ पर सबहि कहउँ समुझाई।
 तेल बोरि पट बाँधि पुनि पावक देहु लगाई॥
 पूँछ हीन बानर तहँ जाइहि।
 तब सठ निज नाथहि लइ आइहि॥
 जिन्ह कै कीन्हिसि बहुत बड़ाई।
 देखउँ मैं तिन्ह कै प्रभुताई॥
 बचन सुनत कपि मन मुसुकाना।
 भइ सहाय सारद मैं जाना॥
 जातुधान सुनि रावन बचना।
 लागे रचैं मूढ़ सोइ रचना॥
 रहा न नगर बसन घृत तेला।
 बाढ़ी पूँछ कीन्ह कपि खेला॥
 कौतुक कहँ आए पुरबासी।
 मारहिं चरन करहिं बहु हाँसी॥
 बाजहिं ढोल देहिं सब तारी।
 नगर फेरि पुनि पूँछ प्रजारी॥
 पावक जरत देखि हनुमंता।
 भयउ परम लघु रूप तुरंता॥



निबुकि चढ़ेउ कपि कनक अटारीं ।
 भई सभित निसाचर नारीं ॥
 दो०-हरि प्रेरित तेहि अवसर चले मरुत उनचास ।
 अट्टहास करि गर्जा कपि बढ़ि लाग अकास ॥
 देह बिसाल परम हरुआई ।
 मंदिर तें मंदिर चढ़ धाई ॥
 जरइ नगर भा लोग बिहाला ।
 झपट लपट बहु कोटि कराला ॥

तात मातु हा सुनिअ पुकारा ।
 एहिं अवसर को हमहि उबारा ॥
 हम जो कहा यह कपि नहिं होई ।
 बानर रूप धरें सुर कोई ॥
 साधु अवग्या कर फलु ऐसा ।
 जरइ नगर अनाथ कर जैसा ॥
 जारा नगरु निमिष एक माहीं ।
 एक बिभीषन कर गृह नाहीं ॥
 ताकर दूत अनल जेहिं सिरिजा ।
 जरा न सो तेहि कारन गिरिजा ॥
 उलटि पलटि लंका सब जारी ।
 कूदि परा पुनि सिंधु मझारी ॥
 दो०-पूँछ बुझाइ खोइ श्रम धरि लघु रूप बहोरि ।
 जनकसुता के आगे ठाढ़ भयउ कर जोरि ॥
 मातु मोहि दीजे कछु चीन्हा ।
 जैसें रघुनायक मोहि दीन्हा ॥
 चूड़ामनि उतारि तब दयऊ ।
 हरष समेत पवनसुत लयऊ ॥



कहेहु तात अस मोर प्रनामा ।
 सब प्रकार प्रभु पूरनकामा ॥
 दीन दयाल बिरिदु संभारी ।
 हरहु नाथ मम संकट भारी ॥
 तात सक्रसुत कथा सुनाएहु ।
 बान प्रताप प्रभुहि समुझाएहु ॥
 मास दिवस महँ नाथु न आवा ।
 तौ पुनि मोहि जिअत नहिं पावा ॥

कहु कपि केहि बिधि राखौं प्राणा ।

तुम्हहू तात कहत अब जाना ॥

तोहि देखि सीतलि भइ छाती ।

पुनि मो कहुं सोइ दिनु सो राती ॥

दो०-जनकसुतहि समुझाइ करि बहु विधि धीरजु दीन्ह ।

चरन कमल सिरु नाइ कपि गवनु राम पहिं कीन्ह ॥

चलत महाधुनि गर्जेसि भारी ।

गर्भ स्त्रवहिं सुनि निसिचर नारी ॥

नाधि सिंधु एहि पारहि आवा ।

सबद किलकिला कपिन्ह सुनावा ॥

हरषे सब बिलोकि हनुमाना ।

नूतन जन्म कपिन्ह तब जाना ॥

मुख प्रसन्न तन तेज बिराजा ।

कीन्हेसि रामचन्द्र कर काजा ॥

मिले सकल अति भए सुखारी ।

तलफत मीन पाव जिमि बारी ॥

चले हरषि रघुनायक पासा ।

पूँछत कहत नवल इतिहासा ॥




तब मधुबन भीतर सब आए।
 अंगद संमत मधु फल खाए॥
 रखवारे जब बरजन लागे।
 मुष्टि प्रहार हनत सब भागे॥
 दो०-जाइ पुकारे ते सब बन उजार जुबराज।
 सुनि सुग्रीव हरष कपि करि आए प्रभु काज॥
 जौं न होति सीता सुधि पाई।
 मधुबन के फल सकहिं कि खाई॥

एहि बिधि मन बिचार कर राजा ।
 आइ गए कपि सहित समाजा ॥
 आइ सबन्हि नावा पद सीसा ।
 मिलेउ सबन्हि अति प्रेम कपीसा ॥
 पूँछी कुसल कुसल पद देखी ।
 राम कृपाँ भा काजु बिसेषी ॥
 नाथ काजु कीन्हेउ हनुमाना ।
 राखे सकल कपिन्ह के प्राना ॥
 सुनि सुग्रीव बहुरि तेहि मिलेऊ ।
 कपिन्ह सहित रघुपति पहिं चलेऊ ॥
 राम कपिन्ह जब आवत देखा ।
 किँएँ काजु मन हरष बिसेषा ॥
 फटिक सिला बैठे द्वौ भाई ।
 परे सकल कपि चरनन्हि जाई ॥
 दो०-प्रीति सहित सब भेटे रघुपति करुना पुंज ।
 पूँछी कुसल नाथ अब कुसल देखि पद कंज ॥
 जामवंत कह सुनु रघुराया ।
 जा पर नाथ करहु तुम्ह दाया ॥



ताहि सदा सुभ कुसल निरतंर ।
 सुर नर मुनि प्रसन्न ता ऊपर ॥
 सोइ बिजई बिनई गुन सागर ।
 तासु सुजसु त्रैलोक उजागर ॥
 प्रभु कीं कृपा भयउ सबु काजू ।
 जन्म हमार सुफल भा आजू ॥
 नाथ पवनसुत कीन्हि जो करनी ।
 सहसहुँ मुख न जाइ सो बरनी ॥

पवनतनय के चरित सुहाए।
 जामवंत रघुपतिहि सुनाए॥
 सुनत कृपानिधि मन अति भाए।
 पुनि हनुमान हरषि हियँ लाए॥
 कहहु तात केहि भाँति जानकी।
 रहति करति रच्छा स्वप्राण की॥
 दो०-नाम पाहरू दिवस निसि ध्यान तुम्हार कपाट।
 लोचन निज पद जंत्रित जाहिं प्राण केहिं बाट॥
 चलत मोहि चूड़ामनि दीन्ही।
 रघुपति हृदयँ लाइ सोइ लीन्ही॥
 नाथ जुगल लोचन भरि बारी।
 बचन कहे कछु जनककुमारी॥
 अनुज समेत गहेहु प्रभु चरना।
 दीन बंधु प्रनतारति हरना॥
 मन क्रम बचन चरन अनुरागी।
 केहिं अपराध नाथ हौं त्यागी॥
 अवगुन एक मोर मैं माना।
 बिछुरत प्राण न कीन्ह पयाना॥



नाथ सो नयनन्हि को अपराधा ।
 निसरत प्रान करहिं हठि बाधा ॥
 बिरह अगिनि तनु तूल समीरा ।
 स्वास जरइ छन माहिं सरीरा ॥
 नयन स्रवहिं जलु निज हित लागी ।
 जरैं न पाव देह बिरहागी ॥
 सीता कै अति बिपति बिसाला ।
 बिनहिं कहें भलि दीनदयाला ॥

दो०-निमिष निमिष करुनानिधि जाहिं कलप सम बीति।
 बेगि चलिअ प्रभु आनिअ भुज बल खल दल जीति॥
 सुनि सीता दुख प्रभु सुख अयना।
 भरि आए जल राजिव नयना॥
 बचन कायँ मन मम गति जाही।
 सपनेहुँ बूझिअ बिपति कि ताही॥
 कह हनुमंत बिपति प्रभु सोई।
 जब तव सुमिरन भजन न होई॥
 केतिक बात प्रभु जातुधान की।
 रिपुहि जीति आनिबी जानकी॥
 सुनु कपि तोहि समान उपकारी।
 नहिं कोउ सुर नर मुनि तनुधारी॥
 प्रति उपकार करौं का तोरा।
 सनमुख होइ न सकत मन मोरा॥
 सुनु सुत तोहि उरिन मैं नाहीं।
 देखेउँ करि बिचार मन माहीं॥
 पुनि पुनि कपिहि चितव सुरत्राता।
 लोचन नीर पुलक अति गाता॥



दो०-सुनि प्रभु बचन बिलोकि मुख गात हरषि हनुमंत।
 चरन परेउ प्रेमाकुल त्राहि त्राहि भगवंत॥
 बार बार प्रभु चहइ उठावा।
 प्रेम मगन तेहि उठब न भावा॥
 प्रभु कर पंकज कपि कें सीसा।
 सुमिरि सो दसा मगन गौरीसा॥
 सावधान मन करि पुनि संकर।
 लागे कहन कथा अति सुंदर॥

कपि उठाइ प्रभु हृदयँ लगावा ।
 कर गहि परम निकट बैठावा ॥
 कहु कपि रावन पालित लंका ।
 केहि बिधि दहेउ दुर्ग अति बंका ॥
 प्रभु प्रसन्न जाना हनुमाना ।
 बोला बचन बिगत अभिमाना ॥
 साखामृग कै बड़ि मनुसाई ।
 साखा तें साखा पर जाई ॥
 नाघि सिंधु हाटकपुर जारा ।
 निसिचर गन बधि बिपिन उजारा ॥
 सो सब तव प्रताप रघुराई ।
 नाथ न कछू मोरि प्रभुताई ॥
 दो०-ता कहँ प्रभु कछु अगम नहिं जा पर तुम्ह अनुकूल ।
 तव प्रभावं बड़वानलहि जारि सकइ खलु तूल ॥
 नाथ भगति अति सुखदायनी ।
 देहु कृपा करि अनपायनी ॥
 सुनि प्रभु परम सरल कपि बानी ।
 एवमस्तु तब कहेउ भवानी ॥



उमा राम सुभाउ जेहिं जाना ।
 ताहि भजनु तजि भाव न आना ॥
 यह संबाद जासु उर आवा ।
 रघुपति चरन भगति सोइ पावा ॥
 सुनि प्रभु बचन कहहिं कपि बृन्दा ।
 जय जय जय कृपाल सुखकन्दा ॥
 तब रघुपति कपिपतिहि बोलावा ।
 कहा चलैं कर करहु बनावा ॥


अब बिलंबु केहि कारन कीजे।
 तुरत कपिन्ह कहूँ आयसु दीजे॥
 कौतुक देखि सुमन बहु बरषी।
 नभ तें भवन चले सुर हरषी॥
 दो०-कपिपति बेगि बोलाए आए जूथप जूथ।
 नाना बरन अतुल बल बानर भालु बरूथ॥
 प्रभु पद पंकज नावहिं सीसा।
 गर्जहिं भालु महाबल कीसा॥
 देखी राम सकल कपि सेना।
 चितइ कृपा करि राजिव नैना॥
 राम कृपा बल पाइ कपिंदा।
 भए पच्छजुत मनहुँ गिरिंदा॥
 हरषि राम तब कीन्ह पयाना।
 सगुन भए सुंदर सुभ नाना॥
 जासु सकल मंगलमय कीती।
 तासु पयान सगुन यह नीती॥
 प्रभु पयान जाना बैदेहीं।
 फरकि बाम अँग जनु कहि देहीं॥



जोड़ जोड़ सगुन जानकिहि होई ।
 असगुन भयउ रावनहि सोई ॥
 चला कटकु को बरनैं पारा ।
 गर्जहिं बानर भालु अपारा ॥
 नख आयुध गिरि पादपधारी ।
 चले गगन महि इच्छाचारी ॥
 केहरिनाद भालु कपि करहीं ।
 डगमगाहिं दिग्गज चिक्करहीं ॥

छं०-चिक्करहिं दिग्गज डोल महि गिरि, लोल सागर खरभरे।
 मन हरष सभ गन्धर्व सुर मुनि, नाग किंनर दुख टेरे।
 कटकटहिं मर्कट बिकट भट, बहु कोटि कोटिन्ह धावहीं।
 जय राम प्रबल प्रताप कोसलनाथ गुन गन गावहीं।
 सहि सक न भार उदार अहिपति, बार बारहिं मोहई।
 गह दसन पुनि पुनि कमठ पृष्ठ, कठोर सो किमि सोहई।
 रघुवीर रुचिर प्रयान प्रस्थिति, जानि परम सुहावनी।
 जनु कमठ खर्पर सर्पराज सो, लिखत अविचल पावनी।
 दो०-एहि बिधि जाइ कृपानिधि उतरे सागर तीर।
 जहँ तहँ लागे खान फल भालु बिपुल कपि बीर॥

उहाँ निसाचर रहहिं ससंका।
 जब तें जारि गयउ कपि लंका॥
 निज निज गृहँ सब करहिं बिचारा।
 नहिं निसिचर कुल केर उबारा॥
 जासु दूत बल बरनि न जाई।
 तेहि आएँ पुर कवन भलाई॥
 दूतिन्ह सन सुनि पुरजन बानी।
 मंदोदरी अधिक अकुलानी॥
 रहसि जोरि कर पति पग लागी।
 बोली बचन नीति रस पागी॥



कंत करष हरि सन परिहरहू।
 मोर कहा अति हित हियँ धरहू॥
 समुझत जासु दूत कइ करनी।
 स्रवहिं गर्भ रजनीचर घरनी॥
 तासु नारि निज सचिव बोलाई।
 पठवहु कंत जो चहहु भलाई॥
 तव कुल कमल बिपिन दुखदाई।
 सीता सीत निसा सम आई॥

सुनहु नाथ सीता बिनु दीन्हें।
 हित न तुम्हार संभु अज कीन्हें॥
 दो०-राम बान अहि गन सरिस निकर निसाचर भेक।
 जब लगि ग्रसत न तब लगि जतनु करहु तजि टेक॥
 श्रवन सुनी सठ ता करि बानी।
 बिहसा जगत बिदित अभिमानी॥
 सभय सुभाउ नारि कर साचा।
 मंगल महुँ भय मन अति काचा॥
 जाँ आवड़ मर्कट कटकाई।
 जिअहिं बिचारे निसिचर खाई॥
 कंपहिं लोकप जाकीं त्रासा।
 तासु नारि सभीत बड़ि हासा॥
 अस कहि बिहसि ताहि उर लाई।
 चलेउ सभाँ ममता अधिकारी॥
 मंदोदरी हृदयँ कर चिंता।
 भयउ कंत पर बिधि बिपरीता॥
 बैठेउ सभाँ खबरि असि पाई।
 सिंधु पार सेना सब आई॥



बूझेसि सचिव उचित मत कहहू।
 ते सब हँसे मष्ट करि रहहू॥
 जितेहु सुरासुर तब श्रम नाहीं।
 नर बानर केहि लेखे माहीं॥
 दो०-सचिव बैद गुर तीनि जौं प्रिय बोलहिं भय आस।
 राज धर्म तन तीनि कर होइ बेगिहीं नास॥
 सोइ रावन कहूँ बनी सहाई।
 अस्तुति करहिं सुनाइ सुनाई॥

अवसर जानि बिभीषनु आवा ।
 भ्राता चरन सीसु तेहिं नावा ॥
 पुनि सिरु नाइ बैठ निज आसन ।
 बोला बचन पाइ अनुसासन ॥
 जौ कृपाल पूँछिहु मोहि बाता ।
 मति अनुरूप कहउँ हित ताता ॥
 जो आपन चाहै कल्याणा ।
 सुजसु सुमति सुभ गति सुख नाना ॥
 सो परनारि लिलार गोसाईं ।
 तजउ चउथि के चंद कि नाई ॥
 चौदह भुवन एक पति होई ।
 भूत द्रोह तिष्टइ नहिं सोई ॥
 गुन सागर नागर नर जोऊ ।
 अलप लोभ भल कहइ न कोऊ ॥
 दो०-काम क्रोध मद लोभ सब नाथ नरक के पंथ ।
 सब परिहरि रघुबीरहि भजहु भजहिं जेहि संत ॥
 तात राम नहिं नर भूपाला ।
 भुवनेस्वर कालहु कर काला ॥




ब्रह्म अनामय अज भगवंता ।
 व्यापक अजित अनादि अनंता ॥
 गो द्विज धेनु देव हितकारी ।
 कृपा सिंधु मानुष तनुधारी ॥
 जन रंजन भंजन खल ब्राता ।
 बेद धर्म रच्छक सुनु भ्राता ॥
 ताहि बयरु तजि नाइअ माथा ।
 प्रनतारति भंजन रघुनाथा ॥

देहु नाथ प्रभु कहूँ बैदेही।
 भजहु राम बिनु हेतु सनेही॥
 सरन गाँ प्रभु ताहु न त्यागा।
 बिस्व द्रोह कृत अघ जेहि लागा॥
 जासु नाम त्रय ताप नसावन।
 सोइ प्रभु प्रगट समुझु जियँ रावन॥
 दो०-बार बार पद लागउँ विनय करउँ दससीस।
 परिहरि मान मोह मद भजहु कोसलाधीस॥
 मुनि पुलस्ति निज सिष्य सन कहि पठई यह बात।
 तुरत सो मैं प्रभु सन कही पाइ सुअवसरु तात॥
 माल्यवंत अति सचिव सयाना।
 तासु बचन सुनि अति सुख माना॥
 तात अनुज तव नीति बिभूषन।
 सो उर धरहु जो कहत बिभीषन॥
 रिपु उतकरष कहत सठ दोऊ।
 दूरि न करहु इहाँ हइ कोऊ॥
 माल्यवंत गृह गयउ बहोरी।
 कहइ बिभीषनु पुनि कर जोरी॥



सुमति कुमति सब कें उर रहहीं ।
 नाथ पुरान निगम अस कहहीं ॥
 जहाँ सुमति तहँ संपति नाना ।
 जहाँ कुमति तहँ बिपति निदाना ॥
 तव उर कुमति बसी बिपरीता ।
 हित अनहित मानहु रिपु प्रीता ॥
 कालराति निसिचर कुल केरी ।
 तेहि सीता पर प्रीति घनेरी ॥

दो०-तात चरन गहि मागउँ राखहु मोर दुलार।
 सीता देहु राम कहँ अहित न होइ तुम्हार॥
 बुध पुरान श्रुति संमत बानी।
 कही बिभीषन नीति बखानी॥
 सुनत दसानन उठा रिसाई।
 खल तोहि निकट मृत्यु अब आई॥
 जिअसि सदा सठ मोर जिआवा।
 रिपु कर पच्छ मूढ़ तोहि भावा॥
 कहसि न खल अस को जग माहीं।
 भुज बल जाहि जिता मैं नाहीं॥
 मम पुर बसि तपसिन्ह पर प्रीती।
 सठ मिलु जाइ तिन्हहि कहु नीती॥
 अस कहि कीन्हसि चरन प्रहारा।
 अनुज गहे पद बारहिं बारा॥
 उमा संत कइ इहइ बड़ाई।
 मंद करत जो करइ भलाई॥
 तुम्ह पितु सरिस भलेहिं मोहि मारा।
 रामु भजें हित नाथ तुम्हारा॥



सचिव संग लै नभ पथ गयऊ ।

सबहि सुनाइ कहत अस भयऊ ॥

दो०-रामु सत्यसंकल्प प्रभु सभा कालवस तोरि ।

मैं रघुवीर सरन अब जाउँ देहु जनि खोरि ॥

अस कहि चला बिभीषनु जबहीं ।

आयू हीन भए सब तबहीं ॥

साधु अवग्या तुरत भवानी ।

कर कल्यान अखिल कै हानी ॥

रावन जबहिं बिभीषन त्यागा।
 भयउ बिभव बिनु तबहिं अभागा॥
 चलेउ हरषि रघुनायक पाहीं।
 करत मनोरथ बहु मन माहीं॥
 देखिहउँ जाइ चरन जलजाता।
 अरुन मृदुल सेवक सुखदाता॥
 जे पद परसि तरी रिषिनारी।
 दंडक कानन पावनकारी॥
 जे पद जनकसुताँ उर लाए।
 कपट कुरंग संग धर धाए॥
 हर उर सर सरोज पद जेई।
 अहोभाग्य मैं देखिहउँ तेई॥
 दो०-जिन्ह पायन्ह के पादुकन्हि भरतु रहे मन लाइ।
 ते पद आजु बिलोकिहउँ इन्ह नयनन्हि अब जाइ॥
 एहि बिधि करत सप्रेम बिचारा।
 आयउ सपदि सिंधु एहिं पारा॥
 कपिन्ह बिभीषनु आवत देखा।
 जाना कोउ रिपु दूत बिसेषा॥



ताहि राखि कपीस पहिं आए।
 समाचार सब ताहि सुनाए॥
 कह सुग्रीव सुनहु रघुराई।
 आवा मिलन दसानन भाई॥
 कह प्रभु सखा बूझिऐ काहा।
 कहइ कपीस सुनहु नरनाहा॥
 जानि न जाइ निसाचर माया।
 कामरूप केहि कारन आया॥

भेद हमार लेन सठ आवा।
 राखिअ बाँधि मोहि अस भावा॥
 सखा नीति तुम्ह नीकि बिचारी।
 मम पन सरनागत भयहारी॥
 सुनि प्रभु बचन हरष हनुमाना।
 सरनागत बच्छल भगवाना॥
 दो०-सरनागत कहूँ जे तजहिं निज अनहित अनुमानि।
 ते नर पाँवर पापमय तिन्हहि बिलोकत हानि॥
 कोटि बिप्र बध लागहिं जाहू।
 आएँ सरन तजउँ नहिं ताहू॥
 सनमुख होइ जीव मोहि जबहीं।
 जन्म कोटि अघ नासहिं तबहीं॥
 पापवंत कर सहज सुभाऊ।
 भजनु मोर तेहि भाव न काऊ॥
 जाँ पै दुष्ट हृदय सोइ होई।
 मोरें सनमुख आव कि सोई॥
 निर्मल मन जन सो मोहि पावा।
 मोहि कपट छल छिद्र न भावा॥



भेद लेन पठवा दससीसा ।
 तबहुँ न कछु भय हानि कपीसा ॥
 जग महुँ सखा निसाचर जेते ।
 लछिमनु हनइ निमिष महुँ तेते ॥
 जाँ सभीत आवा सरनाई ।
 रखिहउँ ताहि प्रान की नाई ॥
 दो०-उभय भाँति तेहि आनहु हँसि कह कृपानिकेत ।
 जय कृपाल कहि कपि चले अंगद हनू समेत ॥

सादर तेहि आगें करि बानर ।
 चले जहाँ रघुपति करुनाकर ॥
 दूरिहि ते देखे द्वौ भ्राता ।
 नयनानन्द दान के दाता ॥
 बहुरि राम छबिधाम बिलोकी ।
 रहेउ ठटुकि एकटक पल रोकी ॥
 भुज प्रलंब कंजारुन लोचन ।
 स्यामल गात प्रनत भय मोचन ॥
 सिंघ कंध आयत उर सोहा ।
 आनन अमित मदन मन मोहा ॥
 नयन नीर पुलकित अति गाता ।
 मन धरि धीर कही मृदु बाता ॥
 नाथ दसानन कर मैं भ्राता ।
 निसिचर बंस जनम सुरत्राता ॥
 सहज पापप्रिय तामस देहा ।
 जथा उलूकहि तम पर नेहा ॥
 दो०-श्रवन सुजसु सुनि आयउँ प्रभु भंजन भव भीर ।
 त्राहि त्राहि आरति हरन सरन सुखद रघुबीर ॥



अस कहि करत दंडवत देखा ।
 तुरत उठे प्रभु हरष बिसेषा ॥
 दीन बचन सुनि प्रभु मन भावा ।
 भुज बिसाल गहि हृदयँ लगावा ॥
 अनुज सहित मिलि ढिग बैठारी ।
 बोले बचन भगत भय हारी ॥
 कहु लंकेस सहित परिवारा ।
 कुसल कुठाहर बास तुम्हारा ॥

खल मण्डली बसहु दिनु राती।
 सखा धरम निबहइ केहि भाँती॥
 मैं जानउँ तुम्हारि सब रीति।
 अति नय निपुन न भाव अनीति॥
 बरु भल बास नरक कर ताता।
 दुष्ट संग जनि देइ बिधाता॥
 अब पद देखि कुसल रघुराया।
 जाँ तुम्ह कीन्हि जानि जन दाया॥
 दो०-तब लागि कुसल न जीव कहूँ सपनेहुँ मन विश्राम।
 जब लागि भजत न राम कहूँ सोक धाम तजि काम॥
 तब लागि हृदयँ बसत खल नाना।
 लोभ मोह मच्छर मद माना॥
 जब लागि उर न बसत रघुनाथा।
 धरें चाप सायक कटि भाथा॥
 ममता तरुन तमी अँधिआरी।
 राग द्वेष उलूक सुखकारी॥
 तब लागि बसति जीव मन माहीं।
 जब लागि प्रभु प्रताप रबि नाहीं॥



अब मैं कुसल मिटे भय भारे।
 देखि राम पद कमल तुम्हारे॥
 तुम्ह कृपाल जा पर अनुकूला।
 ताहि न ब्याप त्रिबिध भव सूला॥
 मैं निसिचर अति अधम सुभाऊ।
 सुभ आचरनु कीन्ह नहिं काऊ॥
 जासु रूप मुनि ध्यान न आवा।
 तेहिं प्रभु हरषि हृदयँ मोहि लावा॥

दो०-अहोभाग्य मम अमित अति राम कृपा सुख पुंज।
 देखेउँ नयन बिरंचि सिव सेव्य जुगल पद कंज॥
 सुनहु सखा निज कहंउँ सुभाऊ।
 जान भुसुंड़ि संभु गिरिजाऊ॥
 जाँ नर होइ चराचर द्रोही।
 आवै सभय सरन तकि मोही॥
 तजि मद मोह कपट छल नाना।
 करउँ सद्य तेहि साधु समाना॥
 जननी जनक बंधु सुत दारा।
 तनु धनु भवन सुहृद परिवारा॥
 सब कै ममता ताग बटोरी।
 मम पद मनहि बाँध बरि डोरी॥
 समदरसी इच्छा कछु नाहीं।
 हरष सोक भय नहिं मन माहीं॥
 अस सज्जन मम उर बस कैसें।
 लोभी हृदयँ बसइ धनु जैसें॥
 तुम्ह सारिखे संत प्रिय मोरें।
 धरउँ देह नहिं आन निहोरें॥



दो०-सगुन उपासक परहित निरत नीति दृढ़ नेम।
ते नर प्राण समान मम जिन्ह के द्विज पद प्रेम॥

सुनु लंकेस सकल गुन तोरें।
तातें तुम्ह अतिसय प्रिय मोरें॥

राम बचन सुनि बानर जूथा।
सकल कहहिं जय कृपा बरूथा॥

सुनत बिभीषनु प्रभु कै बानी।
नहिं अघात श्रवनामृत जानी॥

पद अंबुज गहि बारहिं बारा।
 हृदयँ समात न प्रेमु अपारा॥
 सुनहु देव सचराचर स्वामी।
 प्रनतपाल उर अंतरजामी॥
 उर कछु प्रथम बासना रही।
 प्रभु पद प्रीति सरित सो बही॥
 अब कृपाल निज भगति पावनी।
 देहु सदा सिव मन भावनी॥
 एवमस्तु कहि प्रभु रनधीरा।
 मागा तुरत सिंधु कर नीरा॥
 जदपि सखा तव इच्छा नाहीं।
 मोर दरसु अमोघ जग माहीं॥
 अस कहि राम तिलक तेहि सारा।
 सुमन बृष्टि नभ भई अपारा॥

दो०-रावन क्रोध अनल निज स्वास समीर प्रचंड।
 जरत विभीषनु राखेउ दीन्हेउ राजु अखंड॥
 जो संपति सिव रावनहि दीन्हि दिऐँ दस माथ।
 सोइ संपदा विभीषनहि सकुचि दीन्हि रघुनाथ॥



अस प्रभु छाड़ि भजहिं जे आना ।
 ते नर पसु बिनु पूँछ बिषाना ॥
 निज जन जानि ताहि अपनावा ।
 प्रभु सुभाव कपि कुल मन भावा ॥
 पुनि सर्वग्य सर्व उर बासी ।
 सर्वरूप सब रहित उदासी ॥
 बोले बचन नीति प्रतिपालक ।
 कारन मनुज दनुज कुल घालक ॥

सुनु कपीस लंकापति बीरा।
 केहि बिधि तरिअ जलधि गंभीरा॥
 संकुल मकर उरग झष जाती।
 अति अगाध दुस्तर सब भाँती॥
 कह लंकेस सुनहु रघुनायक।
 कोटि सिंधु सोषक तव सायक॥
 जद्यपि तदपि नीति असि गाई।
 बिनय करिअ सागर सन जाई॥
 दो०-प्रभु तुम्हार कुलगुर जलधि कहिहि उपाय विचारि।
 विनु प्रयास सागर तरिहि सकल भालु कपि धारि॥
 सखा कहि तुम्ह नीकि उपाई।
 करिअ दैव जाँ होइ सहाई॥
 मंत्र न यह लछिमन मन भावा।
 राम बचन सुनि अति दुख पावा॥
 नाथ दैव कर कवन भरोसा।
 सोषिअ सिंधु करिअ मन रोसा॥
 कादर मन कहँ एक अधारा।
 दैव दैव आलसी पुकारा॥




सुनत बिहसि बोले रघुबीरा ।
 ऐसेहिं करब धरहु मन धीरा ॥
 अस कहि प्रभु अनुजहि समुझाई ।
 सिंधु समीप गए रघुराई ॥
 प्रथम प्रनाम कीन्ह सिरु नाई ।
 बैठे पुनि तट दर्भ डसाई ॥
 जबहिं बिभीषन प्रभु पहिं आए ।
 पाछें रावन दूत पठाए ॥

दो०-सकल चरित तिन्ह देखे धरें कपट कपि देह।
 प्रभु गुन हृदयें सराहहिं सरनागत पर नेह॥
 प्रगट बखानहिं राम सुभाऊ।
 अति सप्रेम गा बिसरि दुराऊ॥
 रिपु के दूत कपिन्ह तब जाने।
 सकल बाँधि कपीस पहिं आने॥
 कह सुग्रीव सुनहु सब बानर।
 अंग भंग करि पठवहु निसिचर॥
 सुनि सुग्रीव बचन कपि धाए।
 बाँधि कटक चहु पास फिराए॥
 बहु प्रकार मारन कपि लागे।
 दीन पुकारत तदपि न त्यागे॥
 जो हमार हर नासा काना।
 तेहि कोसलाधीस कै आना॥
 सुनि लछिमन सब निकट बोलाए।
 दया लागि हँसि तुरत छोड़ाए॥
 रावन कर दीजहु यह पाती।
 लछिमन बचन बाचु कुलघाती॥



दो०-कहेहु मुखागर मूढ़ सन मम संदेसु उदार।
 सीता देइ मिलहु न त आवा कालु तुम्हार॥
 तुरत नाइ लछिमन पद माथा।
 चले दूत बरनत गुन गाथा॥
 कहत राम जसु लंकाँ आए।
 रावन चरन सीस तिन्ह नाए॥
 बिहसि दसानन पूँछी बाता।
 कहसि न सुक आपनि कुसलाता॥

पुनि कहु खबरि बिभीषन केरी।
 जाहि मृत्यु आई अति नेरी॥
 करत राज लंका सठ त्यागी।
 होइहि जव कर कीट अभागी॥
 पुनि कहु भालु कीस कटकाई।
 कठिन काल प्रेरित चलि आई॥
 जिन्ह के जीवन कर रखवारा।
 भयउ मृदुल चित सिंधु बिचारा॥
 कहु तपसिन्ह कै बात बहोरी।
 जिन्ह के हृदयँ त्रास अति मोरी॥
 दो०-की भइ भेंट कि फिरि गए श्रवन सुजसु सुनि मोर।
 कहसि न रिपु दल तेज बल बहुत चकित चित तोर॥
 नाथ कृपा करि पूँछेहु जैसें।
 मानहु कहा क्रोध तजि तैसें॥
 मिला जाइ जब अनुज तुम्हारा।
 जातहिं राम तिलक तेहि सारा॥
 रावन दूत हमहि सुनि काना।
 कपिन्ह बाँधि दीन्हें दुख नाना॥



श्रवन नासिका काटैं लागे ।
 राम सपथ दीन्हें हम त्यागे ॥
 पूँछिहु नाथ राम कटकाई ।
 बदन कोटि सत बरनि न जाई ॥
 नाना बरन भालु कपि धारी ।
 बिकटानन बिसाल भयकारी ॥
 जेहिं पुर दहेउ हतेउ सुत तोरा ।
 सकल कपिन्ह महँ तेहि बलु थोरा ॥

अमित नाम भट कठिन कराला ।
 अमित नाग बल बिपुल बिसाला ॥
 दो०-द्विविद मयंद नील नल अंगद गद बिकटासि ।
 दधिमुख केहरि निसठ सठ जामवंत बलरासि ॥
 ए कपि सब सुग्रीव समाना ।
 इन्ह सम कोटिन्ह गनइ को नाना ॥
 राम कृपाँ अतुलित बल तिन्हहीं ।
 तून समान त्रैलोकहि गनहीं ॥
 अस मैं सुना श्रवन दसकंधर ।
 पदुम अठारह जूथप बंदर ॥
 नाथ कटक महँ सो कपि नाहीं ।
 जो न तुम्हहि जीतै रन माहीं ॥
 परम क्रोध मीजहिं सब हाथा ।
 आयसु पै न देहिं रघुनाथा ॥
 सोषहिं सिंधु सहित झष ब्याला ।
 पूरहिं न त भरि कुधर बिसाला ॥
 मर्दि गर्द मिलवहिं दससीसा ।
 ऐसेइ बचन कहहिं सब कीसा ॥



गर्जहिं तर्जहिं सहज असंका ।
 मानहुँ ग्रसन चहत हहिं लंका ॥
 दो०-सहज सूर कपि भालु सब पुनि सिर पर प्रभु राम ।
 रावन काल कोटि कहूँ जीति सकहिं संग्राम ॥
 राम तेज बल बुद्धि बिपुलाई ।
 सेष सहस सत सकहिं न गाई ॥
 सक सर एक सोषि सत सागर ।
 तव भ्रातहिं पूँछेउ नय नागर ॥


तासु बचन सुनि सागर पाहीं ।
 मागत पंथ कृपा मन माहीं ॥
 सुनत बचन बिहसा दससीसा ।
 जों असि मति सहाय कृत कीसा ॥
 सहज भीरु कर बचन दूढ़ाई ।
 सागर सन ठानी मचलाई ॥
 मूढ़ मृषा का करसि बड़ाई ।
 रिपु बल बुद्धि थाह मैं पाई ॥
 सचिव सभीत बिभीषन जाकें ।
 बिजय बिभूति कहाँ जग ताकें ॥
 सुनि खल बचन दूत रिस बाढ़ी ।
 समय बिचारि पत्रिका काढ़ी ॥
 रामानुज दीन्ही यह पाती ।
 नाथ बचाइ जुड़ावहु छाती ॥
 बिहसि बाम कर लीन्ही रावन ।
 सचिव बोलि सठ लाग बचावन ॥

दो०-वातन्ह मनहि रिझाई सठ जनि घालसि कुल खीस ।
 राम विरोध न उबरसि सरन बिष्णु अज ईस ॥



दो-की तजि मान अनुज इव प्रभु पद पंकज भृंग ।
 होहि कि राम सरानल खल कुल सहित पतंग ॥
 सुनत सभय मन मुख मुसुकाई ।
 कहत दसानन सबहि सुनाई ॥
 भूमि परा कर गहत अकासा ।
 लघु तापस कर बाग बिलासा ॥
 कह सुक नाथ सत्य सब बानी ।
 समुझहु छाड़ि प्रकृति अभिमानी ॥

सुनहु बचन मम परिहरि क्रोधा।
 नाथ राम सन तजहु बिरोधा॥
 अति कोमल रघुबीर सुभाऊ।
 जद्यपि अखिल लोक कर राऊ॥
 मिलत कृपा तुम्ह पर प्रभु करिही।
 उर अपराध न एकउ धरिही॥
 जनकसुता रघुनाथहि दीजे।
 एतना कहा मोर प्रभु कीजे॥
 जब तेहिं कहा देन बैदेही।
 चरन प्रहार कीन्ह सठ तेही॥
 नाइ चरन सिरु चला सो तहाँ।
 कृपासिंधु रघुनायक जहाँ॥
 करि प्रनामु निज कथा सुनाई।
 राम कृपाँ आपनि गति पाई॥
 रिषि अगस्ति कीं साप भवानी॥
 राछस भयउ रहा मुनि ग्यानी॥
 बाँदि राम पद बारहिं बारा॥
 मुनि निज आश्रम कहूँ पगु धारा॥



दो०-बिनय न मानत जलधि जड़ गए तीनि दिन बीति ।
 बोले राम सकोप तब भय बिनु होइ न प्रीति ।।
 लछिमन बान सरासन आनू ।
 सोषाँ बारिधि बिसिख कृसानू ।।
 सठ सन बिनय कुटिल सन प्रीती ।
 सहज कृपन सन सुन्दर नीती ।।
 ममता रत सन ग्यान कहानी ।
 अति लोभी सन बिरति बखानी ।।

क्रोधिहि सम कामिहि हरि कथा।
 ऊसर बीज बाँँ फल जथा॥
 अस कहि रघुपति चाप चढ़ावा।
 यह मत लछिमन के मन भावा॥
 संधानेउ प्रभु बिसिख कराला।
 उठी उदधि उर अंतर ज्वाला॥
 मकर उरग झष गन अकुलाने।
 जरत जंतु जलनिधि जब जाने॥
 कनक थार भरि मनि गन नाना।
 बिप्र रूप आयउ तजि माना॥
 दो०-काटेहिं पड़ कदरी फरइ कोटि जतन कोउ सींच।
 बिनय न मान खगेस सुनु डाटेहिं पड़ नव नीच॥
 सभय सिंधु गहि पद प्रभु केरे।
 छमहु नाथ सब अवगुन मेरे॥
 गगन समीर अनल जल धरनी।
 इन्ह कइ नाथ सहज जड़ करनी॥
 तव प्रेरित मायाँ उपजाए।
 सृष्टि हेतु सब ग्रंथनि गाए॥



प्रभु आयसु जेहि कहँ जस अहई ।
 सो तेहि भाँति रहें सुख लहई ॥
 प्रभु भल कीन्ह मोहि सिख दीन्ही ।
 मरजादा पुनि तुम्हरी कीन्ही ॥
 ढोल, गवाँर, सूद्र, पसु नारी ।
 सकल ताड़ना के अधिकारी ॥
 प्रभु प्रताप मैं जाब सुखाई ।
 उतरिहि कटकु न मोरि बड़ाई ॥

प्रभु अग्या अपेल श्रुति गाई।
करौं सो बेगि जो तुम्हहि सोहाई॥

दो०-सुनत विनीत बचन अति कह कृपाल मुसुकाई।
जेहि बिधि उतरै कपि कटकु तात सो कहहु उपाई॥

नाथ नील नल कपि द्वौ भाई।

लरिकाई रिषि आसिष पाई॥

तिन्ह कें परस किऐं गिरि भारे।

तरिहहिं जलधि प्रताप तुम्हारे॥

मैं पुनि उर धरि प्रभु प्रभुताई।

करिहउँ बल अनुमान सहाई॥

एहि बिधि नाथ पयोधि बँधाइअ।

जेहिं यह सुजसु लोक तिहुँ गाइअ॥

एहिं सर मम उत्तर तट बासी।


हतहु नाथ खल नर अघ रासी॥

सुनि कृपाल सागर मन पीरा।

तुरतहिं हरी राम रनधीरा॥

देखि राम बल पौरुष भारी।

हरषि पयोनिधि भयउ सुखारी॥



**सकल चरित कहि प्रभुहि सुनावा ।
चरन बंदि पाथोधि सिधावा ॥**

छं०-निज भवन गवनेउ सिंधु श्रीरघुपतिहि यह मत भायऊ ।
यह चरित कलि मलहर जथामति दास तुलसी गायऊ ॥
सुख भवन संसय समन दमन बिषाद रघुपति गुन गना ।
तजि सकल आस भरोस गावहि सुनहि संतत सठ मना ॥
दो०-सकल सुमंगल दायक रघुनायक गुन गान ।
सादर सुनहिं ते तरहिं भव सिंधु बिना जलजान ॥

**इति श्रीमद् रामचरित् मानसे सकल कलिकलुष
विध्वंसने पंचमः सोपानः समाप्तः ।**

॥श्री सुन्दर काण्ड इति॥



श्री हनुमान चालीसा

॥ दोहा ॥

श्री गुरु चरन सरोज रज, निज मनु मुकुरु सुधारि ।
 वरनऊँ रघुवर विमल जसु जो दायकु फल चारि ॥
 बुद्धिहीन तनु जानिके, सुमिरौँ पवन-कुमार ।
 बल बुधि विद्या देहु मोहिं, हरहु क्लेस बिकार ॥

॥ चौपाई ॥

जय हनुमान ज्ञान गुन सागर ।
 जय कपीस तिहुँ लोक उजागर ॥
 रामदूत अतुलित बल धामा ।
 अंजनि-पुत्र पवनसुत नामा ॥
 महाबीर बिक्रम बजरंगी ।
 कुमति निवार सुमति के संगी ॥
 कंचन बरन बिराज सुबेसा ।
 कानन कुण्डल कुंचित केसा ।



हाथ बज्र औ ध्वजा बिराजै।
 काँधे मूँज जनेऊ साजै॥
 संकर सुवन केसरी नन्दन।
 तेज प्रताप महा जग बन्दन॥
 बिद्यावान गुनी अति चातुर।
 राम काज करिबे को आतुर॥
 प्रभु चरित्र सुनिबे को रसिया।
 राम लषन सीता मन बसिया॥



सूक्ष्म रूप धरि सियहिं दिखावा।
 बिकट रूप धरि लंक जरावा॥
 भीम रूप धरि असुर संहारे।
 रामचन्द्र के काज सँवारे॥
 लाय सजीवन लखन जियाये।
 श्री रघुबीर हरषि उर लाये॥
 रघुपति कीन्हीं बहुत बड़ाई।
 तुम मम प्रिय भरतहि सम भाई॥



सहस्र बदन तुम्हरो जश गावै।
 अस कहि श्रीपति कंठ लगावै॥
 सनकादिक ब्रह्मादि मुनीसा।
 नारद सारद सहित अहीसा॥
 जम कुबेर दिगपाल जहाँ ते।
 कबि कोबिद कहि सके कहाँ ते॥
 तुम उपकार सुग्रीवहिं कीन्हा।
 राम मिलाय राज पद दीन्हा॥



तुम्हरो मन्त्र बिभीषन माना ।
 लंकेस्वर भए सब जग जाना ॥
 जुग सहस्र जोजन पर भानू ।
 लील्यो ताहि मधुर फल जानू ॥
 प्रभु मुद्रिका मेलि मुख माही ।
 जलधि लांघि गये अचरज नाहीं ॥
 दुर्गम काज जगत के जेते ।
 सुगम अनुग्रह तुम्हरे तेते ॥



राम दुआरे तुम रखवारे।
 होत न आज्ञा बिनु पैसारे॥
 सब सुख लहै तुम्हारी सरना।
 तुम रच्छक काहू को डर ना॥
 आपन तेज सम्हारो आपै।
 तीनों लोक हाँक ते काँपै॥
 भूत पिसाच निकट नहिं आवै।
 महाबीर जब नाम सुनावै॥




नासै रोग हरै सब पीरा।
 जपत निरंतर हनुमत बीरा॥
 संकट तें हनुमान छुड़ावै।
 मन क्रम बचन ध्यान जो लावै॥
 सब पर राम तपस्वी राजा।
 तिन के काज सकल तुम साजा॥
 और मनोरथ जो कोइ लावै।
 सोइ अमित जीवन फल पावै॥



चारों जुग परताप तुम्हारा।
 है परसिद्ध जगत उजियारा॥
 साधु सन्त के तुम रखवारे।
 असुर निकंदन राम दुलारे॥
 अष्ट सिद्धि नौ निधि के दाता।
 अस बर दीन जानकी माता॥
 राम रसायन तुम्हरे पासा।
 सदा रहो रघुपति के दासा॥



तुम्हरे भजन राम को पावै।
 जनम जनम के दुख बिसरावै॥
 अन्त काल रघुबर पुर जाई।
 जहां जन्म हरि-भक्त कहाई॥
 और देवता चित्त न धरई।
 हनुमत सेइ सर्व सुख करई॥
 संकट कटै मिटै सब पीरा।
 जो सुमिरै हनुमत बलबीरा॥



जै जै जै हनुमान गोसाई।
 कृपा करहु गुरु देव की नाई॥
 जो सत बार पाठ कर कोई।
 छूटहिं बंदि महा सुख होई॥
 जो यह पढ़ै हनुमान चलीसा।
 होय सिद्धि साखी गौरीसा॥
 तुलसीदास सदा हरि चेरा।
 कीजै नाथ हृदय महँ डेरा॥



॥ दोहा ॥

पवनतनय संकट हरन, मंगल मूरति रूप।
राम लखन सीता सहित, हृदय बसहु सुर भूप॥

॥ हनुमत् स्तुति ॥


श्रीराम हृदयानन्दं भक्त कल्पमहीरुहम्।
अभयं वरदं दोर्भ्यां कलये मारुतात्मजम्॥
अपराजित नमस्तेऽतु नमस्ते रामपूजित!
प्रस्थानं च करिष्यामि, सिद्धिर्भवतु मे सदा॥

संकटमोचन हनुमानाष्टक

मत्तगयन्द छन्द

बाल समय रवि भक्षि लियो तब,
 तिनहुं लोक भयो अँधियारो।
 ताहि सों त्रास भयो जग को,
 यह संकट काहु सों जात न टारो॥
 देवन आनि करी बिनती तब,
 छाँड़ि दियो रवि कष्ट निवारो।
 को नहिं जानत है जग में कपि,
 संकटमोचन नाम तिहारो॥ 1॥
 बालि की त्रास कपीस बसै,
 गिरि जात महाप्रभु पंथ निहारो।
 चौंकि महा मुनि शाप दियो तब,
 चाहिये कौन बिचार बिचारो॥
 कैद्विज रूप लिवाय महाप्रभु,
 सो तुम दास के सोक निवारो।

को नहिं जानत है जग में कपि,
 संकट मोचन नाम तिहारो॥२॥
 अंगद के संग लेन गये सिय,
 खोज कपीस यह बैन उचारो।
 जीवत ना बचिहाँ हम सों जु,
 बिना सुधि लाए इहाँ पगु धारो॥
 हेरि थके तट सिन्धु सबै तब,
 लाए सिया सुधि प्रान उबारो।
 को नहिं जानत है जग में कपि,
 संकटमोचन नाम तिहारो॥३॥
 रावन त्रास दई सिय को सब,
 राक्षसि सो कहि सोक निवारो।
 ताहि समय हनुमान् महाप्रभु,
 जाय महा रजनीचर मारो॥
 चाहत सीय असोक सो आगि सु,
 दै प्रभु मुद्रिका सोक निवारो।



को नहिं जानत है जग में कपि,
 संकटमोचन नाम तिहारो ॥ 4॥
 बान लग्यो उर लछिमन के तब,
 प्रान तजे सुत रावण मारो।

लै गृह बैद्य सुषेन समेत,
 तबै गिरि द्रोण सुबीर उपारो॥
 आनि संजीवन हाथ दई तब,
 लछिमन के तुम प्राण उबारो।
 को नहिं जानत है जग में कपि,
 संकटमोचन नाम तिहारो॥ 5॥
 रावण जुद्ध अजान कियो तब,
 नाग की फाँस सबै सिर डारो।
 श्री रघुनाथ समेत सबै दल,
 मोह भयो यह संकट भारो॥
 आनि खगेस तबै हनुमान जु,
 बन्धन काटि सुत्रास निबारो।
 को नहिं जानत है जग में कपि,
 संकटमोचन नाम तिहारो॥ 6॥
 बंधु समेत जबै अहिरावन,
 लै रघुनाथ पाताल सिधारो।



देविहि पूजि भलि बिधि सोँ,
बलि देउ सबै मिलि मंत्र बिचारो ।।
जाय सहाय भयो तब ही,
अहिरावन सैन्य समेत सँहारो ।

को नहिं जानत है जग में कपि,
 संकटमोचन नाम तिहारो॥ 7॥
 काज किए बड़ देवन के तुम,
 बीर महाप्रभु देखि बिचारो।
 कौन सो संकट मोर गरीब को,
 जो तुमसो नहिं जात है टारो॥
 बेगि हरो हनुमान महाप्रभु,
 जो कछु संकट होय हमारो।
 को नहिं जानत है जग में कपि,
 संकटमोचन नाम तिहारो॥ 8॥

॥ दोहा ॥

लाल देह लाली लसे,
 अरु धरि लाल लँगूर।
 बज्र देह दानव दलन,
 जय जय जय कपि सूर॥

श्री बजरंग बाण


॥ दोहा ॥

निश्चय प्रेम प्रीतित ते, विनय करें सनमान।
तेही के कारज सकल, शुभ सिद्धि करें हनुमान॥

॥ चौपाई ॥

जय हनुमन्त सन्त हितकारी,
सुन लीजै प्रभु अरज हमारी।
जन के काज विलम्ब न कीजे,
आतुर दौरि महा सुख दीजे।
जैसे कूदि सिन्धु महि पारा,
सुरसा बदन पैठि विस्तारा।
आगे जाई लंकिनी रोका,
मारेहु लात गई सुर लोका।
जाय विभीषन को सुख दीन्हा,
सीता निरखि परम पद लीन्हा।

बाग उजारि सिन्धु मैंह बोरा,
 अति आतुर यम कातर तोरा।
 अक्षय कुमार को मारि संहारा,
 लूम लपेट लंक को जारा।
 लाह समान लंक जरि गई,
 जय जय धुनि सुरपुर में भई।
 अब विलम्ब केहि कारन स्वामी,
 कृपा करहु उर अन्तर्यामी।
 जय जय लक्ष्मण प्राण के दाता,
 आतुर होय दुख करहु निपाता।
 जै गिरधर जै जै सुख सागर,
 सुर समूह समरथ भट नागर।
 ॐ हनु हनु हनु हनुमंत हठीले,
 बैरिहि मारु बज्र की कीले।
 गदा बज्र ले बैरिहिं मारो,
 महाराज प्रभु दास उबारो।



ऊँकार हुँकार महाप्रभु धावो,
 बज्र गदा हनु विलम्ब न लावो।
 ॐ ह्रीं ह्रीं ह्रीं हनुमन्त कपीशा,
 ॐ हुँ हुँ हुँ हनु अरि अरि शीशा।
 सत्य होहु हरि शपथ पाय के,
 राम दूत धरु मारु जाय के।
 जय जय जय हनुमन्त अगाधा,
 दुःख पावत जन केहि अपराधा।
 पूजा जप तप नेम अचारा,
 नहीं जानत हौं दास तुम्हारा।
 बन उपवन मग गिरि गृह माँही,
 तुम्हरे बल हम डरपत नाहीं।
 पाँय परौ कर जोरि मनावौं,
 यहि अवसर अब केहि गौहरावौं।
 जय अंजनी कुमार बलवन्ता,
 शंकर सुवन वीर हनुमन्ता।

बदन कराल काल कुल घालक,
 राम सहाय सदा प्रति पालक।
 भूत प्रेत पिशाच निशाचर,
 अग्नि बैताल काल मारी मर।
 इन्हें मारु तोहिं शपथ राम की,
 राखु नाथ मरजाद नाम की।
 जनक सुता हरि दास कहावो,
 ताकी शपथ विलम्ब न लावो।
 जय जय जय धुनि होत अकाशा,
 सुमिरत होत दुसह दुःख नाशा।
 चरण शरण कर जोरि मनावौं,
 यहि अवसर अब केहि गोहरावौं।
 उठु उठु चलु तोहि राम दुहाई,
 पाँय परौं कर जोरि मनाई।
 ॐ चँ चँ चँ चँ चँ चलंता,
 ॐ हनु हनु हुन हनु हनुमंता।

ॐ हँ हँ हाँक देत कपि चंचल,
 ॐ सं सं सहमि पराने खल दल।
 अपने जन को तुरत उबारो,
 सुमिरत होय आनंद हमारो।
 यह बजरंग बाण जेहि मारे,
 ताहि कहो फिर कौन उबारे।
 पाठ करें बजरंग बाण की,
 हनुमत रक्षा करें प्राण की।
 यह बजरंग बाण जो जापै,
 ताते भूत प्रेत सब कापै।
 धूप देय अरु जपै हमेशा,
 ताके तन नहिं रहै क्लेशा।

॥ दोहा ॥

प्रेम प्रीतिहि कपि भजै,
 सदा धरै उर ध्यान।
 तेहि के कारज सकल शुभ,
 सिद्ध करें हनुमान॥



श्री हनुमत्-स्तवन

सो०-प्रवनडं पवनकुमार खल वन पावक ग्यानधन॥
 जासु हृदय आगार बसहिं राम सर चाप धर॥
 श्लोक-अतुलित बलधामं हेमशैलाभदेहं,
 दनुजवनकृशानुं ज्ञानिनामग्रगणयम्।
 सकलगुणनिधानं वानराणामधीशं,
 रघुपतिप्रियभक्तं वातजातं नमामि॥
 गोष्पदीकृतवारीशं मशकीकृतराक्षसम्,
 रामायणं महामालारत्नं वन्देऽनिलात्मजम्॥
 अञ्जनीनन्दनं वीरं जानकीशोकनाशम्।
 कपीशमक्षहन्तारं वन्दे लंकाभयंकरम्॥

उल्लङ्घय सिन्धोः सलिलं सलीलं यः,
 शोकवह्निं जनकात्मजायाः॥
 आदाय तेनैव ददाह लंका,
 नमामि तं प्राञ्जलिराञ्जनेयम्॥
 मनोजवं मारुततुल्यवेगं,
 जितेन्द्रियं बुद्धिमतां वरिष्ठम्॥
 वातात्मजं वानरयूथमुख्यं,
 श्रीरामदूतं शरणं प्रपद्ये॥
 आञ्जनेयमतिपाटलाननं,
 काञ्चनाद्रिकमनीयविग्रहम्॥
 पारिजाततरुमूलवासिनं,
 भावयामि पावमाननन्दनम्॥
 यत्र तत्र रघुनाथकीर्तनं,
 तत्र तत्र कृतमस्तकाञ्जलिम्॥
 वाष्पवारिपरिपूर्णलोचनं,
 मारुतिं नमत राक्षसान्तकम्॥

॥ सियावर रामचन्द्र की जय ॥




श्री हनुमान जी की आरती

आरती कीजै हनुमान लला की।
 दुष्ट दलन रघुनाथ कला की॥
 जाके बल से गिरिवर काँपे।
 रोग-दोष जाके निकट न झाँपे॥
 अंजनि पुत्र महा बलदाई।
 सन्तन के प्रभु सदा सहाई॥
 दे बीरा रघुनाथ पठाये।
 लंका जारि सीया सुधि लाये॥


लंका सो कोट समुद्र सी खाई।
जात पवनसुत बार न लाई॥
लंका जारि असुर संहारे।
सियाराम जी के काज सँवारे॥
लक्ष्मण मूर्छित पड़े सकारे।
आनि संजीवन प्रान उबारे॥
पैठि पताल तोरि जम-कारे।
अहिरावन की भुजा उखारे॥
बायें भुजा असुर दल मारे।
दहिने भुजा संत जन तारे॥
सुर नर मुनि आरती उतारें।
जय जय जय हनुमान उचारें॥
कंचन थार कपूर लौ छाई।
आरती करत अंजना माई॥
जो हनुमान जी की आरती गावैं।
बसि बैकुण्ठ परम पद पावैं॥
लंक विध्वंस किये रघुराई।
तुलसीदास स्वामी आरती गाई॥

श्री रामायणजी की आरती

आरती श्री रामायण जी की।
 कीरति कलित ललित सिय पी की॥ आरती०
 गावत ब्रह्मादिक मुनि नारद।
 बाल्मीक बिग्यान बिसारद॥
 सुक सनकादि सेष अरु सारद।
 बरनि पवनसुत कीरति नीकी॥ आरती०
 गावत वेद पुराण अष्टदस।
 छओं सास्त्र सब ग्रन्थन को रस॥
 मुनि जन धन सन्तन को सरबस।
 सार अंस समत सबही की॥ आरती०
 गावत संतत सम्भु भवानी।
 अरु घटसम्भव मुनि बिग्यानी
 व्यास आदि कबिबर्ज बखानी।
 कागभुसुंडि गरुड़ के ही की॥ आरती०
 कलिमल हरनि विषय रस फीकी।
 सुभग सिंगार मुक्ति जुबती की
 दलन रोग भव भूरि अमी की।
 तात मात सब बिधि तुलसी की आरती०



सुन्दरकाण्ड



श्री शिव प्रकाशन मन्दिर